

AMBIENTE

'NA COSA DUCI

Mi ci attruvai accussì quasi pi casu
'o Munti, 'nta rutunna di l'Ermuni;
e mparpai affacciannumi a firrata
unni aperta all'intornu è la viduta:

Trapani era dda sutta stinnigghiata
ch'i so' salini, l'isuli e lu mari,
cu lu celu pittatu a pinziddati
di russu, di cilesti e di turchisi.

Lu sulì poi, 'na pennula di focu,
era ancora supra l'isuli a pittari
cu lu so' russu pinziddati strammi
supra ddu celu, ddu mari e ddi salini.

E sarà stata l'ura du tramuntu,
o voi pi la staciuni cunsinsienti,
o forsi picchè prima avia chiuvutu,
paria... 'na cosa duci di manciari.

A manu a manu c'u suli ja calannu
lu tonu di lu quattru si canciava:
li culura pigghiavanu cchiù forza
comu quannu c'asciuca la pittura.

Sull'onuri... era un quadru di Monet!
Ristau accusi addumatu p'un minutu
fin'a quannu di bottu... s'astutau.
Ancora 'mpasimatu... mi squagghiau!

U 'NNESTU

- Si, è u so' tempu.
Chi ci 'nzitamu, 'nta 'sta mennula,
persicu o pircocu?
- No, aspetta;
mi procurai 'sti marzi
di prunu americanu
chi si fa grossu accusi.
- Allora mittemu du' marzi,
una pi latu, a cullettu...
Ora a rafia...
A pici p'un sbintari...
Perfettu!
'N'atr'annu i sazzi
e fra du' anni...
vidi chi arvuliddu!

VALDERICI

Niscivi du tracoddu
e Valderici m'apparsi ch'era un quadru:
Santa Barnaba
cu Cofanu dda 'n funnu;
chiù a manca Bonagia
cu la so' turri e lu so' mati;
versu punenti la vaddata,
ch'i munti 'n luntanza;
e lu paisi, 'nto mezzu,
tutt'allungu,
cu Rausia chiù supra,
a chiudiri u scinariu.
E un sulì tantu,
'n celu.

A PINNATA

Pinnata! nomu semplici e anticu;
u postu giustu
unni passari 'na sirata stramma
cu 'na fazzulittata d'amici.

.....
Ch'i to' seggi di curina,
c'a to' buffetta,
c'a vecchia maidda,
c'u quararu,
c'u furnu,
ch'i cannati e u vinu di l'annata,
si' antica e fistusa.
Si' un ghiri a tempi luntani
cu l'amici d'avannu.

PANI CUNZATU

Ida 'mpasta... e Bertu camia.
'Sta sira a pinnata è 'n festa
pi 'na manciata di pani cunzatu
cu 'na pennula d'amici.

.....
Si fannu i furmi:
du' vusteddi a chilu, pi preu,
e u restu tutt'a lunniceddi
pi saziari li vucchi affamati.

.....
'Nto jardinu c'è ciauru di pani;
e, comu si trattassi di camiu,
eccu chi a frotti arrivanu li genti.

.....
I lunniceddi su' sfurnati
e cunzati cu sali, ogghiu e arrianu.
Pi cu' gradisci, supr'a buffetta,
spiticchi a voluntà:
sardi salati, alivi, primu sali,
milinciani, pipareddi arrustuti.

Certu, comu voli l'usanza,
«Giacominu», u vinu di l'annata
chi fa arrivisciri omini morti,
è presentu a cannati chini.
Si mancia, si vivi, si ridi,
quarcunu tartagghia,
e tra 'na risata e n'autra
c'è puru u brinnisi da' za' Lina
chi ricivi battuti di manu.
I mennuli atturrati pi finiri,
e... va' scurdatilla 'sta sirata!

PIZZIATA

Ida, è tantu c'un semu 'n cumpagnia!
A pinnata è scunsulata, chi si fa?
Di 'na pizziata all'antica chi ni dici?
E allura, avanti cu li 'mmiti;
e 'un ti scurdari a Salvu,
chi ni duna 'na manu p'a cunzata.

.....
Prestu picciotti, chi u furnu è quasi pruntu.
Avanti! farina supra a pala
e priparamu a 'nfurnari sti sfinciuna.

.....
Gesù e Maria comu su' unciati!
Lesti li manu. Pigghiati a mezzaluna!

.....
«Giacominu» 'nte cannati paparia
e sciogghi i linguì:
a la facci di cu' ni voli mali
e a la saluti nostra e di l'amici!

MAROTTA

A mezzu u Munti, sutta lu casteddu,
da parti chi talia versu la Ficu,
c'è un locu, Marotta mintuvatu,
dunni campau la nostra riritati.

Un bagghiu anticu all'usu sicilianu
cu casi 'ntornu e muru a tramuntana,
carrittaria 'nt'on latu cu la stadda
e un sidili di petra tutt'allongu.

E c'era 'na lumia 'nto 'n piricinu,
un arvulu di persicu 'nto 'n muru,
du' chianti 'i gelsuminu 'nta li gnuni,
'na parmicedda nana 'nto 'n mugnanu.

Fora, versu mezz'jornu, c'è u timpuni,
(pari un barcuni supra di lu munnu)
unni, a li tempi, versu lu tramuntu,
n'arricughiamu tutti comu 'n chiesa.

E viu a me' soru, armata 'i fisarmonica,
chi va sunannu tutti li canzuni;
riviù a me' patri, trippedi e cannucciali,
chi va trasennu dintra di li casi.

A sira, doppu mangiatu, a ringanera
tutti supra u sidili a scialacori:
u curatulu tagghia a leva pilu
carteddi 'i ficurinia frischi frischi.

Quant'anni su' passati di ddi tempi :
me' patri nun c'è chiù, me' matri è ghiunta,
niatri figghi ognunu a so' famiglia...
Marotta è ddà; u nomu sulamenti.